

- राइजिंग राजस्थान ग्लोबल इन्वेस्टमेंट समिट कामयाबी सागे पूरी व्ही- दो साल पाछे ओजू राख्यी जावेला आ समिट।
- प्रधानमंत्री नरेन्द्र मोदी कह्यो-विकसित भारत बणावण सारू नौजवान इनोवेटर्स ने नुवा तरीका ऊं सोचण री ज़रूरत।
- उपराष्ट्रपति जगदीप धनखड़ देश मांय प्रति व्यक्ति आय मांय बधोतरी सारू कौशल विकास केंद्रां री तादाद बधावण माथे ज़ोर दीनो।
- भजन लाल सरकार रा कामकाज रो एक साल पूरो व्हेवण रे मौके प्रदेश मांय न्यारा-न्यारा कार्यक्रम राख्या जावेला।
- राज्य मांय सीळो बायरो बाजण ऊं ठण्ड और तेज व्ही-सीकर जिला रा फतेहपुर मांय पारो शून्य ऊं एक डिग्री सेल्सियस नीचे उतर्यो।

000

जयपुर मांय राख्यी ज्यी तीन दिन री राइजिंग राजस्थान ग्लोबल इन्वेस्टमेंट समिट आज पूरी व्हे ग्यी। इण रा समापन जळसा मांय मुख्यमंत्री भजनलाल शर्मा कह्यो के समिट मांय करी ज्या 35 लाख करोड़ रुपया रा न्यारा-न्यारा करार माथे काम करण सारू सरकार पूरी ताकत लगावेला। वे कह्यो के राजस्थान केवल इतिहास री गाथावां रो नी बल्कि भविष्य री कामयाबी रो बिंब भी बणणो चाहिजे। ई मौके मुख्यमंत्री दो साल पछे ओजू राइजिंग राजस्थान ग्लोबल इन्वेस्टमेंट समिट राखण रो ऐलाण कीनो। वे कह्यो के ई समिट मांय करी ज्या करार ऊं जुड़्या काम रो हिसाब ई दियो जावेला।

.....  
कार्यक्रम मांय केंद्रीय मंत्री धर्मेंद्र प्रधान कह्यो के मारवाड़ी अर राजस्थान रा कारोबारी देश-दुनिया मांय नाम कमायो है। वे कह्यो के राजस्थान रा रेहवासियां रो हुनर उद्यमशीलता है। श्री प्रधान कह्यो के ऊर्जा री खपत रा मामला मांय अमरीका अर चीन पाछे भारत तीजा नम्बर परां है अर ऊर्जा क्षेत्र मांय निवेश शुभ संकेत है। वे कह्यो के स्वच्छ ऊर्जा रा मामला मांय राजस्थान अगुवाई करण लायक बण ग्यो है।

.....  
इण ऊं पैली राख्यी ज्या एमएसएमई कॉन्क्लेव मांय उद्योग मंत्री राज्यवर्धन राठौड़ कह्यो के राज्य मांय लघु, मध्यम अर सूक्ष्म उद्यमां ने 1 एकड़ ताई ज़मीं रा कन्वर्जन सारू मोटी छूट दी जावेला। राठौड़ कह्यो के राजस्थान देश रो ऐडो पहलो राज्य बणेला, जठे एमएसएमई इकाइयां ने किंण ई राज्य कानून ऊं मंजूरी लेवण अर निरीक्षण री छूट व्हेला। वे एमएसएमई ने मुहैया कराया जा रह्या न्यारा-न्यारा सुबीतां रो ई जिकर कीनो। सम्मेलन मांय शिरकत करण सारू आया निवेशक ई सम्मेलन रा बारा मांय आकाशवाणी ने विचार बताया। मुंबई रा देवेश दाधीच कह्यो के वां री भणार्-लिखाई रा हलका मांय काम करण री मर्जी है।

.....  
यू.के. ऊं आया डॉ. विमल शर्मा कह्यो के राज्य मांय मानसिक स्वास्थ्य अर रिसर्च मांय काम री घणी संभावनावां है।

000

प्रधानमंत्री नरेंद्र मोदी कह्यो है के नौजवानां कने 21वीं सदी रा भारत सारू न्यारा-न्यारा नजरिया अर समाधान है। आज स्मार्ट इंडिया हैकार्थॉन 2024 रा ग्रैंड फिनाले मांय वीडियो कॉन्फ्रेंसिंग रे मार्फत यंग इनोवेटर्स सागे बातचीत करता थकां वे कह्यो के देश सगळां री कोशिशां ऊं तेजी ऊं आगे बध रह्यो है। प्रधानमंत्री कह्यो के विकसित भारत बणावण सारू इनोवेटर्स ने नुवा तरीका ऊं सोचण री जरूरत है।

पांच दिन री ई हैकार्थॉन मांय जयपुर री एक गैर सरकारी युनिवर्सिटी ने ई एक केन्द्र रा तौर ऊं शामिल करी ज्यी है। केन्द्र रा नोडल अधिकारी डॉ. दिनेश कुमार सैनी बतायो के इण मांय 56 लड़कियां समेत डोढ़ सौ विद्यार्थी शिरकत कर रह्या है।

000

उपराष्ट्रपति जगदीप धनखड़ कह्यो है के कौशल इंसान ने तपस्वी बणावण सागे भरोसो अर आत्म सम्मान ई देवे है। श्री धनखड़ आज जयपुर मांय सोहन लाल स्मृति कौशल केंद्र रा उद्घाटन रे मौके बोल रह्या हा। वे कह्यो के विकसित भारत रो गेलो गांवाई हलकां अर कौशल केंद्रां ऊं ही निकळे है। उपराष्ट्रपति कह्यो के देश मांय हर एक जणा री आमदनी आठ गुणा ताई बधावण री जरूरत है, जो कौशल विकास केंद्रां रे जरिये व्हे सके है। वे कह्यो के भारत रा कुशल लोग दुनियाभर मांय सेवा दे सके है। उपराष्ट्रपति कह्यो हक री जाणकारी सागे कर्तव्यबोध ई व्हेवणो चाहिजे। श्री धनखड़ माली राष्ट्रवाद री हिमायत करता थकां कह्यो के जो सामान देश मांय बण रह्या है वां ने दिसावर ऊं मंगावण ऊं बचणो चाहिजे। श्री धनखड़ कुदरती साधनां ने बुद्धिमानी सागे काम लेवण माथे जोर दीनो।

000

लोकसभा अध्यक्ष ओम बिरला बाधिन टी-114 रा बच्चां ने मुकुंदरा नेशनल टाइगर रिजर्व अर रामगढ़ विषधारी उद्यान मांय छोड़ण ने सकारात्मक पहल बतायी है। वे सोशल मीडिया पोस्ट रे जरिये कह्यो के इण ऊं कोटा-बूंदी संसदीय हलका मांय नेचर टूरिज्म ने बधावो मिलेला। वे कह्यो के रामगढ़ विषधारी उद्यान मांय सफारी सुरू व्हे ग्यी है अर मुकुंदरा टाइगर रिजर्व मांय ई बेगी ई टाइगर सफारी सुरू करी जावेला।

000

राज्य री मौजूदा सरकार रा कामकाज रो एक साल पूरो व्हेवण रा सिलसिला मांय काल ऊं 15 दिसम्बर ताई न्यारा-न्यारा कार्यक्रम राख्या जावेला। जयपुर समेत न्यारी-न्यारी ठौड़ां काल संवारे रन फॉर विकसित राजस्थान व्हेला। जोधपुर मांय काल मुख्यमंत्री रोजगार उत्सव अर युवा सम्मेलन राख्यो जावेला। मुख्यमंत्री भजन लाल शर्मा चिकित्सा मंत्री गजेन्द्र सिंह खींवसर सागे ई रो उद्घाटन करेला। 13 दिसम्बर ने किसान सम्मेलन राख्या जावेला। भजनलाल सरकार री पहली वर्षगांठ रे मौके सरकार री ओर ऊं टाबरियां अर महिलावां रा भला ऊं जुड़ी न्यारी-न्यारी योजनावां सुरू करी जावेला। 14 दिसम्बर ने महिला सम्मेलन व्हेला। 15 दिसम्बर ने सेवा शिविर अर खूनदान शिविर समेत भांत-भांत रा कार्यक्रम राख्या जावेला। भजनलाल सरकार री पहली वर्षगांठ रे मौके सरकारी महकमां री ओर ऊं आयोजन व्हेला। जयपुर विकास प्राधिकरण री ओर ऊं कालवाड़ रोड़ परां नारी का बास मांय पैली वाळा प्रधानमंत्री अटल बिहारी वाजपेयी रा नाम ऊं अटल विहार योजना रा तैत 284 प्लॉट काट्या जावेला। सूचना अर जनसम्पर्क विभाग री ओर ऊं जिलां मांय विकास प्रदर्शनियां लगाई जावेला। सलूबर मांय काल रन फॉर विकसित राजस्थान, युवा सम्मेलन, रोजगार उत्सव, जिला स्तर री प्रदर्शनी, जिला दर्शन पुस्तिका रो विमोचन अर पंच गौरव री सुरुआत करी जावेला। 13 दिसंबर ने किसान सम्मेलन, 14 दिसंबर ने महिला सम्मेलन अर अंत्योदय सेवा शिविर राख्या जावेला।

000

सीकर रा पैली वाळा विधायक, स्वतंत्रता सेनानी अर किसान नेता रणमल सिंह 102 साल री उम्र मांय आज वां रा पैतृक गांव कटराथल मांय देवलोक व्हे गया। साल 1941 ऊं 1944 ताई शिक्षक रा तौर ऊं काम करण वाळा रणमल सिंह अध्यापक रा ओहदा ऊं इस्तीफो दे र जयपुर प्रजामंडल मांय शामिल व्हे गया अर आजादी री लड़ाई मांय सिरकत कीनी। वे साल 1977 मांय कांग्रेस रा विधायक रह्या। उपराष्ट्रपति जगदीप धनखड़ अर राज्यपाल हरिभाऊ बागडे वां रे देवलोक व्हेवण परां शोक जतायो है।

000

जयपुर रा जगतपुरा मांय अक्षय पात्र चौराहा माथे आज मुख्यमंत्री भजनलाल शर्मा रा काफिला री दो गाड़ियां ने एक टैक्सी टक्कर मार दीनी। हादसा मांय 5 पुलिस वाळां समेत सात जणां जख्मी व्हे गया। मुख्यमंत्री जख्मी लोगां री मौके ई मदद कर र वां ने अस्पताल पूगाया।

000

प्रदेश मांय बाज रह्या सीळा बायरा ऊं ठण्ड रो असर तेज व्हे गयो है। धौलपुर, पाली, जैसलमेर, बारां, कोटा, करौली अर माउंटआबू समेत केई ठोड़ां शीतलहर चालण लागी है। सीकर जिला रा फतेहपुर शेखावाटी मांय पहली दफा आज पारो शून्य ऊं एक डिग्री सेल्सियस नीचे उतर गयो। सीकर मांय डोढ़, चूरू मांय 1 दशमलव 8 अर हनुमानगढ़ जिला रा संगरिया मांय अढ़ाई डिग्री सेल्सियस तापमान दर्ज करी ज्यो। राजधानी जयपुर मांय ई पारो उतर र 8 डिग्री सेल्सियस दर्ज करी ज्यो। सरहदी जिला जैसलमेर मांय ई तेज सर्दी अर कोहरा रे बावजूद बीएसएफ रा जवान 24 ई घंटा सरहद री हिफाजत मांय लाग्योड़ा है। वठे शीतलहर ऊं आम जिन्दगी माथे घणो असर पड़ रह्यो है। मौसम केन्द्र, जयपुर आवता 4-5 दिन ताई केई ठोड़ां शीतलहर रो दौर चालतो रेहवण रा आसार जताया है। उत्तर ऊं आ रह्या सीळा बायरा रा असर ऊं प्रदेश मांय आवता 24 घंटा मांय पारो 2 डिग्री सेल्सियस ताई उतरण रा आसार है।

000